

松江府志卷五十四

古今人傳六

明

林景暘字紹熙華亭人隆慶二年進士選庶吉士授禮科給事中神宗幼冲小璫客用等在左右景暘進十二箴又疏請正大明會典宗藩事例皆允行轉兵科巡視京營請廣召募立選鋒均糧賞勤教演凡十餘事時張居正當國綜覈名實景暘所奏皆得施行軍政爲之一新進太常少卿改南通政進太僕卿丁父憂服闋家居不出會當事欲改金山衛爲州景暘遺書撫按謂設州必

松江府志

卷五十四

古今人傳六

一

多置官吏所治少而所擾多事得寢巡撫胡執禮令所屬縣田出助役錢率七十畝徵一金景暘固爭遂得減十之七捐田百畝助學又以三百畝贍族年七十五卒子有麟字仁甫以父廕歷官龍安知府清勤有才略祀

龍安名宦祠孫希顥自有傳

通志參修  
林氏族譜

蔡汝賢字用卿青浦人隆慶二年進士授大名府推官佐治水著勞績擢爲御史疏劾勳戚無顧忌執政與漳浦令朱孟有隙諷汝賢以事中之不應後朝議以王守仁從祀廟廷汝賢因上疏乞以李侗羅從彥從祀又請復青浦縣治皆從其言出爲四川參議累遷廣東左布政

晉副都御史巡撫廣西遷南京兵部右侍郎致仕汝賢通籍年已四十有六敷歷中外二十餘年未嘗歸里所至以清介稱未第時喪偶終身不復娶待人接物有道之氣穆然可挹卒年七十二著有諫垣疏草披雲彙集

若干卷

陳志  
賢達

喬木字伯梁爲諸生試輒冠其曹倭難起從父鏗禦倭屢出奇計隆慶二年成進士知安吉州州民苦歲貢栗木上言罷之管內民田腴瘠相錯吏因緣爲奸木勾股其田區別高下豪右無所容私天目諸山水陡發往往齧城損稼木築斗門得免衝激遷潞安同知潞爲藩王治

松江府志

卷五十四

古今人傳六

二

歲給將軍中尉以下祿萬計皆親授不假胥吏其豪橫者摧抑之擢井陘兵備井陘扼燕晉之衝北控倒馬所轄千餘里木一障乘邊戰守悉備茨溝營卒盜礦多烏合衆竄不可迹乃選土著八百人充伍漸汰諸募者盜遂息歲侵便宜發倉全活甚衆遷福建參議均稅平徭躬行節儉尋以病歸居川沙募衆濬渠二十里以時蓄洩會風飄海舶邏者以倭告木止勿殺檢牒乃朝鮮貢使導之歸具表以謝卒祀鄉賢又祔祀父鏗仰德祠子拱宸郡諸生究心經術拱宿任兩浙鹽運副使平鹽筴

修齋志拱璧另有傳

陳志  
賢達

曹銑字子良華亭人隆慶二年進士授行人司歷兵部郎出爲漳州府漳俗好鬪很銑至多方化導民平情釋忿無相讎有黎秀才者以小隙訐訟連年銑霽威爲好語激發之感泣求息番舶歲輸羨餘以充經費銑悉裁之卒於官無以斂僚屬爲捐俸成之

金山志

宋堯武字季鷹華亭人世居虹橋隆慶二年進士知信陽州改惠州林道乾者擁衆數萬相小琉球三年將謀奪其國國人不從乃復航海六年春率舟師突至將士皆譁堯武登舟以義諭之道乾乃仰天言曰明公以德言綏我逆之不詳顧語健兒簡部內惠州女子十八人委

松江府志

卷五十四

古今人傳六

三

之泥沙而去丁母憂服闋補福州守尋掌嶺北道晉參滇南分守金滄姚關戍兵懷異志語憲臬不之信尋起事執通判某去堯武亟勒兵截其歸路賊飛走俱窮遂乞降巡按御史謂守臣曰早從參知寧至是邪初撫臣李公材征緬甸捷還忽訛言濫敘婦人級御史訪之堯武曰李公以道術自期明公奈何發大難會有搆之者御史意遂決露章上天子震怒緹騎逮撫臣至擬午門誑言律人皆冤之御史懊悔而人愈益重堯武後告歸卒年六十五有八子文學茂韶最賢孫徵璧自有傳

雲間

志略參郭

志名臣

陸從平字履素華亭人居郡城望仙橋應寅季子隆慶二年進士令清豐調停保馬之役民得息肩爲建生祠祀之擢南京營繕主事權稅蕪湖處脂不潤有大賈置金酒罌中爲壽正色卻之晉都水郎中出爲漳州守謫知灤州移判臨江尋守思南播酋方蓄異謀遂上書中丞纒纒數千言度其變必起已而往勘嚴爲之備思民賴以無恐遷兩浙轉運使鉤稽積弊更新約束商民兩便大計以齒邁註考遂歸實則年尚壯也鍵關謝客日以課子爲事暇則結社賦詩留心撰述著有轂音集燕思齋稿熬波集明農集行世卒年七十五

雲間人物志

松江府志

卷五十四

古今人傳六

四

諸純臣字午泉華亭人隆慶四年舉人任河南府推官清

介之操一時無出其右者以病歸

河南通志

金從洋華亭人隆慶五年進士知曲江縣累官至貴州參議分鎮銅仁會蠹苗亂營壘未立卒伍多羸弱從洋按地形規要害以松桃爲川苗門戶宜扼吭而守之因築營堡屯兵守禦賊不敢窺時官弁恣睢市井騷動白撫臣嚴禁民若更生在官二年志潔行廉外和中毅諸將吏感且畏之擢滇臬去民遮道送有臥轍者

貴州通志

高文炳本姓王上海人隆慶五年進士授四川敘州推官敘有三峒名九絲蠻者孟獲遺種也時出擄婦女財貨

遇官兵卽入關關名凌霄地斗絕蜀撫曾省吾初爲旁  
邑令值蠻出幾爲所害及撫蜀議進討檄取文炳贊畫  
文炳定計以端午節行乃自裹氈與敢死士從山後掩  
至賊方醉不知所爲遂奪其關馘蠻王阿大阿耆等設  
武寧衛城功上晉秩一階入刑曹出知慶遠陞貴州憲  
副致政歸卒年七十六

陳志  
賢達

許樂善字修之華亭人隆慶五年進士知邠縣人爲御史  
掌河南道典甲辰大計晉南光祿卿改南通政使請告  
歸樂善在邠蠲除酒稅修築邑城邠民賴焉在臺值張  
居正奪情都御史率諸御史上公疏慰留諸御史皆署

松江府志

卷五十四

古今人傳六

五

名樂善爲居正門下士獨不署按畿南有棗強令倚門  
第爲不法劾治其罪主計時條上六事遂著爲令甲又  
疏請停礦稅救建言得罪御史曹學程舉朝稱之其後  
兩起卿秩旋赴旋歸所著有適志齋稿卒年八十賜祭  
葬曾孫纘曾自有傳

婁志

唐本堯字世承上海人隆慶五年進士授金溪知縣廉明  
練達承前令廢弛之後加意振刷時條編之法初行他  
邑多疑阻本堯行之分毫不擾課諸生文體丕變召拜

監察御史歷江西副使貴州參政

江西  
通志

李伯春字友卿上海人昭祥從子也隆慶五年進士授刑

部主事以明允爲尙書嚴清所器重使修定條例晉郎中出知濟南府屬歲饑民王登以妖言煽衆擒置之法登妄稱內外黨千餘人皆勿問出倉穀鉅萬斛賑貸人心遂安遷浙江按察副使轉湖廣參政守陵中貴孫某欲奪民沙洲田又橫索里夫折直皆挫抑之尋以母老棄官歸有兩弟仲春叔春皆親自教授叔春登萬歷己丑進士除福州府推官丁艱起台州入爲刑部郎陞歸德府知府值河決後城郭傾圮飢民數萬聚葦澤閒剽掠監司欲興兵叔春固請解散之皆感泣來歸又蠲逋責給牛種戶口漸復後論調歸起按察副使乞休伯春

松江府志

卷五十四

古今人傳六

六

兄弟同堂共爨友愛甚篤仲春當伯季仕宦常主奉養孝謹尤著年五十四哭母過哀卒室無餘財伯春以產均授其子郡守喻均表其廬曰一門孝友伯春第二子繼厚萬歷戊午鄉薦仲春孫之楠天啟辛酉舉人之杜

國朝順治以明經貢太學

郭志名臣

俞汝爲字毅夫華亭人三歲失母父明時親鞠之從膝上授句讀比長力學隆慶五年成進士授德化令縣當九江孔道弱者患貧瘠獷悍者多出沒萑苻中乃授方略縛渠魁釋連染請截歲餉以備兵荒不二年縣大治議築郭州隄自小池西岸抵德化觜延袤三千八百餘丈

疏山鑿石下竹爲榭壘小池口水門一區崇三文闔丈  
餘旱潦蓄洩邑民永賴稱爲俞公隄丁內艱服除補壽  
陽調建德當路倚重擢南駕部出爲山東僉事請罷張  
秋稅局有讒者遂歸侍養起知沁陽州興學校賑饑荒  
撫流移修文中子祠創州志政績多可紀患風痺歸踰  
年召爲南京工部郎不起卒年七十一所著詳藝文中  
子廷諤天啓甲子舉人以博雅稱陳繼儒修郡志廷諤  
實佐之

郭志  
名臣

馮時可字元成華亭人大理恩之第八子隆慶五年進士  
授刑部主事累官浙江按察使敷歷中外咸有治績尤

松江府志

卷五十四

古今人傳六

七

以著述爲海內所重弱冠登第遷轉刑兵兩曹歷事五  
尚書凡有建白輒屬時可起草肆力爲古文辭日益有  
名已由薊門歷河洛荆蜀入夜郎去國益遠作西征集  
自粵而楚而浙往來萬里作超然樓集里居及僑寄吳  
閬日文譽四馳作天池石湖皆可繡霞北征諸集晚年  
登太行陟羅浮南踰金齒汎舟彭蠡洞庭作後北征燕  
喜溟南武陵諸集他如寶善編藝海洄酌五經諸解尤  
有關繫窺古作者論者謂時可父兄忠孝己獨以文章  
名世雖文人相輕或議其詩文汗漫要其著書滿家不  
失爲一時之冠居鄉亦以長厚稱

參修松  
風餘韻

莫是龍字雲卿以字行更字廷韓方伯如忠子也生有異資十歲能屬文十四補博士弟子員工古文詞書畫陵轍今古意氣豪逸一時諸名流無敢抗席學使者高其名行不次貢於庭時宰有欲以翰苑處之者是龍意不屑也王世貞汪道昆咸推重之張佳允巡撫江南彌加欽禮居恆喜延獎後進常若不及有文集行世

郭志文苑

張所敬字長輿上海人弱冠補弟子員與陳太僕所蘊輩竝有時名又以古文詞爲王世貞所推重郡邑長折節下之邑令顏洪範聘修邑乘纂輯之功居多

郭志文苑

徐璠字魯卿相國文貞子也爲諸生以廕授右府都事轉

松江府志

卷五十四

古今人傳六

八

後府經歷旋轉宗人府經歷遷知廣南府未任改尙寶丞會建萬壽宮兼工部營繕司主事工成賜四品服擢太常卿仍領司事進通義大夫廕一子隆慶二年文貞致政歸璠亦請假回籍璠多才略識大體其在右府時有降寇百餘人璠待之恩威互濟在後府念所轄爲畿輔險要於驗放傳警必詳必慎上供薪葦商人例有餽金璠盡卻之性孝友文貞薨廬墓六年置祭田以供歲祀復置田六百畝以贍宗族鄉人之役於官者最苦主庫璠上書兩臺罷之卒年六十四賜諭祭曾孫本高貴晉贈榮祿大夫太子太傅子元春字正夫號寅陽年十

六補諸生隨父官京師寄錦衣籍改順天府學生舉萬  
歷元年鄉試明年成進士授刑部主事改禮部遷員外  
郎歷官光祿尚寶卿陞太僕少卿擢正卿旋晉太常卿  
元春登第時祖階方謝政家居遺書戒以母躁進毋上  
人毋標榜立門戶元春揭諸座右朝夕諷覽率循惟謹  
從宦二十年所在侃侃持正咸有成績官兩曹用法平  
恕嘗雪孫元垂死之冤在祠部條上因革大典咸著爲  
令乞養歸築愛日堂以奉父父子皆官太常司寇王世  
貞稱其三世皆三品上文武忠孝爲人倫之極年五十  
卒著有西堂集孫有慶字豫章號台室性嚴毅負經濟

松江府志

卷五十四

古今人傳六

九

才嘗謁王文肅於京邸文肅器重之語人曰徐豫章不  
愧世家子未冠襲世職積資至三品有慶初補廕時分  
巡中城適東廠有緝獲事緹帥劉某委訊之有慶燭其  
誣劉恐忤大璫意有慶艷然曰朝廷所恃者法耳屈法  
徇情某不能也其剛正如此年二十九卒

徐氏家傳  
參鄉評錄

徐繼溥字汝文文貞階孫官邵武通判有能聲憲長某謂  
之曰若世家子吾爲若地以一札候中朝某貴人當得  
內轉繼溥佯謝歸具文詳請病假弟肇美字章夫以錦  
衣衛武生仕本衛百戶亦以不屑謁崔魏告歸終身自

放於詩酒

竝徐氏世  
德紀略

潘允達號澄源上海人少聰穎有聲成均仕大官丞時堂  
庫耗損臺使將彈主卿允達以羸羨充之所全實多出  
監汀州再判慶陽督餉士卒悅服亢旱禱雨神應林居  
二十載屢舉鄉飲賓醇謹誠篤卒年八十

上海志

姚章字尚綱上海人志尚高逸詩有陶謝風書法宗黃魯  
直嘗游荆溪陽羨閒愛其山水清僻遂移家焉後又至  
采石之紅木山市地數畝結屋棲遲卒年八十四卽葬  
山麓子雲字時望家貧績學上海令鄭洛書興社學禮  
聘爲師亦山林淹博之士

上海志

俞寰字允寧華亭人居青村樸愿沈靜喜讀書工詞賦然

松江府志

卷五十四

古今人傳六

十

不求人知甘貧守分終歲不入城市故人亦少知之

上海志

田有相字道子華亭人年十七補博士弟子員性恬逸學  
使者按部校士以醉失期遂棄去居泖上治圃藝橘每  
秋深時綠陰朱實侍父杖履游行其際具旨醕爲樂父

因號橘莊翁人稱有相爲孝隱云

南吳舊話

張拙字汝吉上海人能詩善篆隸隱居不仕陸文裕深引  
爲社友嘗和深白槿詩深擊節推爲擅場詩云嬾隨宮  
女候羊車欲嫁潘郎鬢已華誰向上林承雨露自甘僻  
壤飽煙霞幽情宥許題紅葉澹影常教占白沙卻笑阿

嬌金屋貯最深恩寵不藏瑕其風操可想矣

上海志

張昉字元昞華亭人性狷介固守窮約或竟日不舉火董傳策慕其人以幣交不受訪之亦不報邑令屠隆造訪避弗見贈金弗納索詩不與惟陸彥章餽以酒粟輒受曰此賢者之惠不妨我廉也其詩集存彥章家書畫皆得古人風骨居南郊之敝廬曰蚊睫巢一童力作日得粟以供食童死困甚假道院以居年七十餘卒

豐志

吳爰字翼夫上海人以詩名高企師事之顧文僖清稱其山林日長無外物以撓其志故其言蕭散閒靜無世俗綺靡脂韋揚袖倚門之態可以知其人矣著有雪窗詩

松江府志

卷五十四

古今人傳六

十一

行於世

上海志

張允孝更名初字太初華亭人人稱貞白先生少游文徵仲之門工六書長於詩善繪畫璩之璞其弟子也晚居沙岡墓廬曰楓庵家甚貧未嘗以藝求於世足不履城市者四十年陸文定樹聲指爲雲間伯夷

郭志  
隱逸

王嗣響字霆叔華亭人年十七與叔避倭金山夜雪極寒臥米囷上語叔曰此李愬擒吳元濟時也明日青村以不守告叔由是奇之下帷攻誦以淹洽稱嘗坐庭中雨驟溢命童子疏渠得甕金妻丁疑母家所藏遽命還之後植榴他所又得金還之如初素不問生產家日落然

苦節彌勵唐宗伯文獻許通政樂善章虞部憲文楊宮  
諭繼禮竝少與同學貴顯後過從多不見見亦不報謁  
有所贈遺亦堅不受也一日憲文飲次謂君屢空若此  
得無有所苦乎嗣響指杯案閒物曰吾不作是想無所  
苦也憲文歎息曰君少慕井丹高潔今果似之矣既取  
老壯窮堅二語號兩益居士著傳以自見門下士甚盛  
咸以禮法約束之有劉生者以喪來謝家中爲設酒嗣  
響曰汝於禮不得飲乃引自酌其峻直如此性嗜學至  
老手不釋卷詩宗盛唐五言律尤澹永稱獨步沒後學  
者私謚爲貞簡先生子藻鑑廷宰俱能世其學廷宰字

松江府志

卷五十四

古今人傳六

十一

毘翁以貢爲沅江令有文采亦無宦情藻鑑孫廣心竝

國朝順治己丑進士

郭志  
獨行

陸時伊字汝莘上海人以病棄儒業農而貧遂葺圃於舍  
旁荷鋤汲水不以爲勞暇則手一編傍大樹長嘯遇人  
簡率無寒暄問不噉人一飯不受人一錢終身不識府

縣門

雲間人  
物志

陳夢庚字台錫華亭人居蕭塘與弟嗣元孿生一時有張  
伯皆仲皆之目夢庚以萬歷二年登進士歷官刑部郎  
中出爲湖州知府遷福建運使謫守柳州擢松潘副使  
左遷陝西少參初與鄒元標同事西曹元標廷杖夢庚

護視無所避生平小心謙謹卽村夫童穉敬禮不敢慢  
居官不名一錢所居老屋數間炊煙亦時或不起也嗣  
元二十六年進士歷官工部轉江西參議其治行載贛  
州名宦夢庚屬纊時子尙幼嗣元撫育之門戶悉倚辦  
焉在藩司未久旋拂衣歸卒嗣元子汝睿天啓元年舉

人郭志  
獨行

彭汝讓字欽之華亭人諸生入國子監中萬歷元年副榜  
爲隆萬詩文社十八子之一著有北征南游擊筑諸稿  
弟汝毅字秉中諸生亦以詩文名子維曦字東陽性至  
孝汝讓坐攀留郡守李多見事中蜚語被收考掠幾斃

松江府志

卷五十四

古今人傳六

十三

維曦上書請代辭甚楚陸文定王文肅閒而憐之致書  
直指俾白其枉家難旣夷室如懸磬汝讓多憂生之作

維曦從而和之聊用寬解焉有鶴和草一卷

奉賢志  
參婁志

蔡倫字樂山青浦人裔出宋儒沈後十世祖光祖移家雲  
間卜居唐行鎮倫與汝賢爲從兄弟少孤事後母以孝  
聞高朗豪雋時譽翕然隆慶四年濬吳松江萬歷元年  
議復縣治移建唐行倫竝董率民夫襄大役知縣卓鈿  
舉其行上於朝給八品秩年七十餘卒子象春字元淳  
行誼端介嘗買郡人尤氏繒帛攜歸覺其貨倍以所餘  
還之崇禎十四年歲祲有士族子金姓者自鬻象春知

之破其券而遣歸焉青浦志

徐三重字伯同青浦人居七寶祖壽父沛竝潛德勿耀三重萬歷二年進士授刑部主事時政尚綜覈三重獨持平恕尚書嚴清知其詳慎使掌封事每有疑獄必咨決焉冢宰欲用為銓曹而三重得疾請急歸念父老遂致仕依親以居父卒慟絕而蘇三重操行端潔門庭肅穆坐無雜賓少博洽工詩文既謝病歸一切棄去潛心性命之學以朱子為宗學者稱為鴻洲先生所著有庸齋日記信古餘論牖景錄采芹錄鴻洲雜著徐氏家則年七十八卒子禎秩以孝謹稱禎稷自有傳秩子銘敬稷

松江府志

卷五十四古今人傳六

十四

子銘常皆登賢書郭志名臣

秦國士字友善上海人萬歷四年舉人從父嘉楫無子欲以為後不應食貧如故嘉楫卒族人爭嗣者議分田宅笑卻之蒼頭挈貲來歸者皆弗納終瀏陽縣令南匯志王明時字治甫華亭人居虹橋萬歷五年進士知冀州改莒州莒多盜又民易逋賦明時至為革火耗嚴贓質數月後賦清而盜戢境內大治晉刑部郎有伐陵樹者株連至一百二十人逮赴刑部擬罪法司欲悉置大辟力爭乃閱原奏凡盜樹者三次以每次為首者論斬餘俱遣戍全活甚多出知岳州府歷南安贛州二府擢河南

按察副使乞養母遂不出明時居官垂二紀歸葺屋數椽以貧故及身棄之亦不以屑意也子垣惠字元維萬歷三十七年副榜性友愛重然諾從祖挺家饒於財生子敏甫市月佻病亟密以重貲四簾託孤於垣惠乃攜歸撫視成立其四簾封閉一室分毫無所動病將沒乃徧召親族出簾付敏封識宛然啓視則所直以巨萬計

婁志

馮大受字咸甫華亭人孝子行可子少負才名工書法爲王世貞莫如忠所器重萬歷七年領鄉薦因公車者三十年謁選得陽山縣改教餘姚擢知慶元縣致仕歸葺

松江府志

卷五十四

古今人傳六

十五

竹素園吟詠其中子弟罕見其面著有竹素園集從弟

大咸亦有文譽

婁志

鍾薇號面溪華亭人居陶宅微時不喜文墨迨子宇淳貴始折節讀書窮搜徧覽遂成通儒知府許維新者廉吏也其集中有云余守松江有事海堧因爲詩歌好事者爭和之中有時見朝霞映沃焦元氣網緼天受冶二句未經人道知爲鍾公薇詩乃求識公問政所急笑不答但言前守李多見司李畢自嚴皆長者從來官此土者得人心無如此余念公不言事而但指兩人此龐參見任棠時也後再見公言松江志書百年不復續責在太

守余曰善哉政莫備於志以志求政公意也一日從容謂公曰公嘗導我以隴西太守倘亦有事可指乎公笑曰余初以李公望公以今觀之雖言李公公亦不能爲也余固問因言曰李一意主寬善縱舍耳有青衣攝事者失期久命杖之其人曰請言狀乃受杖因坐檐下徐徐解鞵以足瘍出示李大憫恤急呼醫與治而慰遣之此事公能爲乎相與笑而罷薇後其子二十年而卒年八十餘著有面溪集雲閒紀事野史倭奴遺事諸書今皆散佚而崑山傳是樓書目有之子宇淳字履道萬歷五年進士授遂昌令在任五年平賦額清盜源修泮宮

松江府志

卷五十四

古今人傳六

十六

以治行最陞南京兵科給事中前後封事凡數十上皆持大體不爲詭激會有以王守仁陳獻章請祀闕里廟庭者議久未決宇淳言二臣竝應從祀詔從之尋擢福建參政便道歸省得疾卒宇淳篤友誼同年鄒元標以論江陵相奪情詔廷杖遣戍宇淳始終爲之左右著有

括蒼吟稿南垣秦疏

奉賢志

錢大復字肇陽華亭人萬歷七年領鄉薦知蓬萊縣下車召父老詢民疾苦撫卹流亡每月吉詣黌宮集講義以訓迪之後以子龍錫登進士致仕歸撰寶六堂銘以自箴構書院爲講學地巡撫周孔教題曰日新書院所置

祭田贍族田千餘畝宗黨咸賴之年七十一無疾而卒  
以子龍錫贈建極殿大學士所著有味道編良知的證

諸書

郭志  
文苑

范廷言字伯龍華亭人居漕涇萬歷七年舉人選廣東萬  
州知州值歲稔廷言蠲逋振廩民賴以全有楊奇欵者  
招聚亡命往來椎埋境內騷動廷言以計擒之萑苻絕  
迹黎洞蠻時逸出賊良民廷言躬往宣諭遂不敢犯又  
仿邱文莊配丁田法五十畝稅一丁田漏丁浮者一切  
覈實汰去之量移瓊州疾卒萬人聞之慟哭罷市數日

子景有文才

華亭  
志

松江府志

卷五十四

古今人傳六

十七

李安祥字元定上海人居竹岡倭寇據柘林出掠沿浦安  
祥父堂倉卒走避寇竟爲所獲驅令負擔歸其巢安祥  
聞之奔仆蘆葦中屢起屢蹶日夜涕泣抵賊巢求見願  
以身代從衆中望見父輒啼不止父見子亦啼賊哀之  
與之食已易翁所肩負屬之他攜者復令安祥執蓋行  
至津口賊躍上船出一令箭插安祥頭令負其父歸安  
祥時已食餼鬻序學使者耿定向旌其門曰至孝隆慶  
改元選貢登己卯鄉薦出知滄州子南春孫繼佑登賢  
書 郭志  
獨行  
張秉介字子石上海人中丞鶚翼之季子也少警敏性至

孝定省兩親雖酷暑不解帶父病劇中夜祈禱願以身  
代及沒舉身自擲擗踊無算既邁疾猶於室中設奠據  
牀微作拜跪狀嬰嬰若兒啼有氣而無聲未幾亦卒年  
二十九天啓初孫泰階疏聞於朝奉旨建坊旌表郭志  
獨行  
張德璨字涵美青浦人庠生性至孝工詩文兼善青烏術  
人有告竭者無不量力周助嘗早行遇遺金五十俟其  
人還之以子以誠貴封翰林院修撰鄉飲大賓郭志  
獨行  
高應炁字仲彩青浦人祖母曹病革應炁禱天引刀割左  
臂肉作羹以進祖母食之尋愈里中父老聞於郡邑榜  
其廬曰孺孝可風時應炁方舞勺讀書晝夜不輟嘔血

松江府志

卷五十四 古今人傳六

十八

而死衆共惜之

郭志  
獨行

曹樸字以素華亭人八歲母病手調湯藥母亡哀毀如成  
人稍長工書尤精鐵筆弟澣遇火裁入火救母柩頭額  
焦爛得廢疾年久漸愈人以爲孝所致曹氏  
宗譜  
王勝字子奇金山衛人以指揮使起家母有痰疾勝吞其  
痰母疾尋愈母卒苦由三年諱日祭祀號泣如初喪總  
戎閩中有獻鮮荔珍錯者辭之曰吾親未嘗食也將校  
聞之感歎事親者莫不加孝居官清介始終不渝尚書  
孫原貞撫閩高其行爲樹表於通衢曰孝廉初未舉子  
妻劉買得一妾詢爲金千戶女立遣還不責償居鄉掩

骼飢多善事偶涉海遇大風歎曰吾無風波風波奈  
我何風果息以壽終於家

華亭志

周士達華亭人以父號海山故號少海幼有至性事父能  
得其歡心及父官豫章留事後母益敬慎父病篤籲天  
請代父沈迷中如聞鬼神云爾有孝子疾遂已初士達  
喪母王方六歲喪繼母陳方十二歲哀毀已若成人及  
父沒遂衰經終其身

王潭字克深上海人居川沙任御醫萬歷十一年海潮衝  
溢漂沒人民潭瘞浮尸數百偕喬鏗議築川沙城備倭  
後城傾圮其孫中書乾昌舉人偕春修葺之又建水洞

松江府志

卷五十四

古今人傳六

十九

石梁置茶亭便民曾孫惠州守逢年寧波通判觀光竝

以文行著稱於時

上海志

沈梅字思雲上海人居橫河南多財好施萬歷十三年旱

十四年春大饑梅出粟三千餘石以賑臺省旌之

南匯志

錢良輔字德卿華亭人父廉篤學通五經陸武惠炳欲延  
致之不往官會稽教諭良輔少孤力學萬歷十年領鄉  
薦祖母沈九十餘臥牀褥間不能起良輔反哺之護持  
惟謹承重居廬哀毀備至富室某欲其族叔之女爲笄  
良輔怒事得已爲治匳具論婚士族范叔子以著書中  
奇禍良輔白當事獲免後以母喪致毀卒子大忠字侃

臣以禮經登天啓元年鄉薦兄大孝早卒經理其產會  
出入之數登諸籍撫其孤成立而還之選如皋教諭識  
許直於儔人中許後以銓部殉國難人服其識鑒尋擢

國子監學錄累官刑部主事

郭志  
獨行

顧允貞字叔復上海人萬歷十年鄉魁授南陽府通判值  
歲稔奉委賑卹晝夜巡察災傷獲全甚衆署府篆以四  
勸四禁曉諭訟者民比之召杜遷工部員外郎陳時務  
數千言不報尋致仕歸造就後學教以敦本崇實崇禎  
閒屢薦不起三舉鄉飲大賓卒年七十九

南匯  
志

何三畏字士抑華亭人居莊行少穎拔爲名諸生徐文貞

松江府志

卷五十四

古今人傳六

二十

階勸其北游遂魁十年壬午榜屢躋公車就選得紹興  
府推官會有邢節婦事拒貴人請抵訟者於法中蜚語  
擬改調遂歸遭母喪誓墓不復出構芝園日與賓客爲  
文酒會賦性伉爽有古豪士風凡臺使長吏式廬造請  
者必開陳利病無所隱諱晚歲尤專心撰述卒年七十

五

郭志  
文苑

高洪謨字九畹上海人舉萬歷十年順天鄉試第一由太  
平教諭遷穀城令有善政旋謝事歸在穀城所獎拔多  
名俊識方岳貢於髫年及岳貢守松江洪謨已沒展墓

修敬焉

上海  
志

方應選字衆甫華亭人居方家巷十歲善屬文萬歷十一年進士知冀州州多大猾有昏暮納櫬輦中託發喪以行劫者廉得之漏下三刻疾馳五十里往捕成就擒旋丁內艱起復汝州治多異政輯汝州志峻整有法識者謂可埒康德涵武功志擢職方改武選時議封倭酋本兵力主之應選抗言不可勿聽已而見給東師果敗又議盡撤東南兵應選復言不可出爲憲臬視兵盧龍會石門兵變應選開陳禍福戮其不用命者事遂定先是以曹郎衡文八閩得人最盛錄文式畿省遂改督閩學政多士傾心焉以勞瘁卒於官年五十四

陳志  
賢達

松江府志

卷五十四

古今人傳六

二十一

章憲文字公觀華亭人萬歷十四年進士官虞部郎督潞王行殿於通灣權璫主乾沒憲文持議堅不能奪又督漕艘於淮釐剔積弊省采木金以萬計丁外艱服除又丁母艱遂絕意仕進著有陶白淮南白石山房諸稿從子元衡萬歷二十六年進士元復天啓元年舉人

婁志

唐文獻字元徵華亭人珣四世從孫萬歷十四年進士殿試第一授修撰乙丑分校南宮時光宗爲太子出閣文獻爲講官每講畢大璫出揖不通一言丙申遷中允丁酉轉諭德尋以病告己亥起原官庚子晉庶子兼侍讀壬寅晉少詹事兼侍讀學士宰臣沈一貫以妖書事傾

尚書郭正域持之急文獻奮袂曰天日昭昭可昧昧邪  
偕其僚楊道賓周如砥陶望齡往見曰郭公將不免人  
謂公實有意殺之一貫跼躄面赤若爲誓者文獻曰亦  
知公無意殺之也第臺省承風下石而公不早竟此獄  
何辭以謝天下一貫斂容謝之獄得稍解文獻旋拜禮  
部右侍郎掌翰林院事然頗失政府意矣初文獻出趙  
用賢門以名節相矜許同年生給事中李沂劾張鯨被  
廷杖文獻掖之出資給其湯藥荊州推官華鈺忤稅監  
逮下詔獄文獻力周旋五載得無死掌翰林日當考察  
執政欲庇一人執不許甲辰副考會試乙巳卒於官贈

松江府志

卷五十四

古今人傳六

二十一

禮部尚書賜祭葬天啓閒贈太子少保諡文恪祀鄉賢  
文獻生有雋才面如削瓜性直諒喜面折人過無敢干  
以私侍講帷尤以端勤肅穆稱文章爾雅家書語語可  
爲訓著有占星堂集先是父敷錫夢巨神降於堂印有  
文曰敷子魁而文獻亦數夢上殿廷若承日在躬者及  
冠多士侍講筵皆符所兆云子允諧天啓四年舉人  
姚士豸字邦憲華亭人居五保萬歷十三年舉人授九江  
推官江州關摧素爲商病士豸汰冗役除苛徵政聲播  
遐邇遷德慶知州不受請託與上官意忤遂歸  
金山志  
施大經字天卿上海人居牖港宋華亭令退翁十一世孫

萬歷十三年舉人署丹徒教諭遷江西瑞州府通判時稅璫方議采木大經抗言曰開采名爲利民其實厲民篁箐深阻民迫將爲盜貴人能豫爲撲滅地乎璫語塞遂止郡有嫠婦涂氏族人利其貲誣以陰事婦家因吏黃某暮夜進千金大經曰枉而白之我分也奈何污我杖吏卻金卒白其冤積二載引疾歸再起惠州通判轉崇府審理告歸著有澤谷農書子沛溥沛字沛然天啓初以貢除河南廉州通判雅度雍容署欽州首建文廟優禮俊髦凡里甲供應一切陋規悉爲詳革復設法擒宿盜造渡船民咸賴之議時務十二條語多切中會出

松江府志

卷五十四

古今人傳六

二十二

師勤王給素袍士卒譁兵備楊嗣昌以屬沛使易五色時已夜沛悉召梓工以萊菔雕花朱墨雜印作彩前後以絳布綴日月形黎明畢具師遂發轉南康同知歸後嗣昌督師致書邀沛許以監司沛堅謝不赴尋卒沛素知醫家言旣罷官益精其術活人甚衆弟溥自有傳

郭志

名臣參廣  
東通志

潘可大號星海青浦人少貧力學縣令屠隆寒夜巡城聞茅屋中讀書聲迹之則可大方讀漢書以此得名萬歷十三年舉人初任慈谿教諭學道某以所作詩屬書可大指其落韻雖忤不顧也陞衛學教授遷知縣乞歸從

弟可觀字貞所少慧年十二補縣學生久之以歲貢任  
常州府訓導母年高善怒一日撻婢齧其指血沾衣可  
觀跪而泣曰母齒無傷否母怒旋解郡稱爲孝子改補  
餘杭識鮑奇模於諸生中後奇模爲縣令一不干以私  
可大子衷峻字震開萬歷四十三年舉人能詩文工書  
早沒可觀子衷昉字公亮天啓四年舉人與弟衷皓皆  
以孝弟樂善著

青浦志

徐爰字彥文華亭人父陟傳見前爰以父蔭仕通政司經  
歷遷上林苑丞苑故有中官領其事欲令丞長跪見同  
官莫敢抗爰疏劾之引祖訓及會典甚覈中貴銜之思

松江府志

卷五十四

古今人傳六

二十四

中傷不得閒遷太僕丞有詔選宮人爰復疏言彗孛告  
警天意不虛臣惟下民之最苦而以得免爲幸者莫如  
選取宮人昔嘉靖閒嘗有是舉民間爭出女子應詔乃  
今事同而趨避異者陛下天威所擊無不摧折積畏深  
恐亦既有日一旦聞詔選取不啻驅犬羊而之屠肆乖  
氣致異上干天象非偶然也疏上不報然事賴以寢萬  
歷十八年捲力克挾其部落火落赤侵西鄙殺略吏民  
當事者懦無策舉兵部尚書鄭洛往經略爰上疏累萬  
言請斬經略本兵二重臣以謝天下直聲大震本兵憤  
甚而爰亦告歸年四十四卒弟珲字直卿號在庵以上

舍生撰授山東濮州州判遷湖廣衡州衛經歷奉職惟  
謹時以民間疾苦陳諸憲長辦賑務按戶分給災黎得  
被實惠去官之日送者數百人家傳

李諫字格卿青浦人萬歷十六年舉人署金壇教諭入爲  
南國子學正遷工部司務刑部員外郎擢守四川敘州  
郡歲散軍餉每有贏前守以入橐沿爲例諫屏卻之致  
政歸卒年七十七子世祺壬戌進士官太僕卿陳志  
賢達

施大諫字叔顯上海人幼穎悟弱冠登萬歷十六年賢書  
不樂仕進閉門注老莊寒暑不輟子紹莘字子野少爲  
華亭縣學生負雋才跌宕不羈初築丙舍於西余之北

松江府志

卷五十四

古今人傳六

二十五

復構別業於南泖之西自號峯泖浪仙好聲伎與華亭  
沈龍善世稱施沈時陳繼儒居東余詩場酒座常與招  
邀來往工樂府著花影集行世早夭無子時論惜之南  
匯

舊  
志

殷廷樞字執夫華亭人父汝孝以舉人官嘉祥鉅野二縣  
令有惠政廷樞萬歷十七年進士由部郎歷官河南按  
察司僉事分巡河北劇盜王好問嘯聚覃懷閒放手四  
劫殺命吏拒官兵勢張甚廷樞以計殲其魁而置餘黨  
勿問境內以安立射圃以課材官招流亡以闢荒土設  
文會以造英才尋晉本省右參議分巡大梁政績卓然

在人口丁祖母憂服闋補福建布政使卒於官

奉賢志

朱正色字穉曾上海人居沈莊允五世孫萬歷十七年進士知淄川縣聽訟多平反喜課士雖恩劇不廢人爲刑部主事恤刑閩中詳讞明允晉郎中曹侍郎學程以建言忤旨論死夏月例得熱審正色語大司寇曰今日之恩獨無片紙加曹君如白雲丹筆何曹得未減論戍出守杭州白前守冤稅使劉成橫覷攫市物民罷市正色舉正之濱海邏卒指琉球賈人爲寇至磔以倖功正色白部使得生還者十九人累擢山西少參政告歸卒年

七十七

南匯志

松江府志

卷五十四

古今人傳六

二十六

陳所蘊字子有上海人萬歷十七年進士授南刑曹歷員外郎中性方嚴有坐法當訊者介大司寇及所蘊座師爲關說所蘊卒按其罪有鐵面郎之目調南選郎參藩江岳副憲大名所至有聲督學中州謝絕請託尋擢參政分守大梁有奸弁上疏請核河南羨帑者乘驛按問同事震懾所蘊折服之弁坐妄言罪未幾乞休後起山西按察使疏辭復起南京太僕寺少卿甫半載歸地方有大利弊往往以片言指陳當事郡邑重之卒年八十

四

陳志  
賢達

吳炯字晉明華亭人居璜溪萬歷十七年進士授杭州推

官入爲兵部主事乞假歸恬靜端介不驚榮利家居十二年始起故官久之進光祿丞天啓中累遷南京太僕卿魏忠賢私人石三畏追論炯黨庇顧憲成落職閒住崇禎初復官炯家世素封無子置義田以贍族人郡中貧士及諸生赴舉者多所資給嘗輸萬金助邊被詔旌

獎

明史

董其昌字元宰華亭人父漢儒耿介力學其昌初就塾比夜漢儒從枕上授經悉能記誦成萬歷十七年進士選庶吉士禮部侍郎田一雋以教習卒官其昌請假走數千里護其喪歸葬還授編修起居注光宗出閣充日

松江府志

卷五十四

古今人傳六

二十七

講官因事啓沃光宗每日屬之主考江西尋有忌之者出爲湖廣按察副使陳疾歸三十二年起爲湖廣提學副使踰年致仕起山東副使登萊兵備河南參政竝不赴光宗踐祚問閣臣曰舊講官董先生安在乃起爲太常寺少卿掌國子監司業天啓二年改兼翰林院侍讀學士纂修實錄奉詔至江南采錄諸司掌故凡萬歷朝章奏案牘輯爲三百本其留中之疏有切於國本藩封人材風俗河渠食貨吏治邊防議論可施行者別爲四十卷做史贊之例每篇系以筆斷成書表進有詔褒美宣付史館三年遷少詹事掌南京翰林院轉禮部右侍

郎四年充纂修實錄副總裁同知經筵尋轉左侍郎五年遷南京禮部尚書時政在奄豎黨禍深酷其昌深自引退遂謝政崇禎四年召拜禮部尚書掌詹事府事七年進太子太保乞骸骨溫旨慰留章七上乃允賜乘傳還九年卒年八十二贈太子太傅諡文敏其昌天才俊逸善談名理少好書畫臨摹真蹟至忘寢食中年悟入微際遂自名家行楷之妙跨絕一代畫集宋元諸家之長論者稱其氣韻秀潤瀟灑生動非人力所及也

明史

陳繼儒字仲醇華亭人幼穎異能文章同縣徐階特器重之長爲諸生與董其昌齊名太倉王錫爵招與子衡讀

松江府志

卷五十四

古今人傳六

二十八

書支硎山王世貞亦雅重繼儒三吳名下士爭欲得爲師友繼儒年甫二十九取儒衣冠焚棄之隱居崑山之陽爲廟祀二陸構草堂數椽焚香晏坐意豁如也時錫山顧憲成講學東林招之謝弗往親亡葬神山麓遂築室東佘山杜門著述雖短翰小詞皆極風致兼善繪事又博聞強識經史諸子術伎稗官與二氏家言靡不校覈或刺取瑣言僻事詮次成書遠近競相購寫徵請詩文者無虛日性喜獎掖士類履常滿戶外片言酬應莫不當意去暇則與黃冠老衲窮峯泖之勝吟嘯忘返足迹罕入城市其昌爲築來仲樓招之至黃道周疏稱志

尚高雅博學多通不如繼儒其推重如此御史吳姓給事中吳永順侍郎沈演等先後論薦謂繼儒道高齒茂宜如聘吳與弼故事屢奉詔徵用皆以疾辭卒年八十二自爲遺令纖悉畢具

明史

陸可交不知何許人結廬千山人莫識其名陳繼儒一見異之與之飲叩知姓氏談易洞徹剝復損益之道發先儒所未發論史則指陳往代興亡詳切時勢語及當世惟蹙額唏噓而已既而謂繼儒曰子雖遁迹而好以賢智先人是求顯也何足語至人之道必也閉爾明塞爾知去爾田廬棄爾妻子變姓名混迹於世庶可免累乎

松江府志

卷五十四

古今人傳六

二十九

繼儒去未幾可交自焚其廬遯去不知所往

南吳舊話錄

李尚袞初各袞字補之上海人府孫少聰穎焯掌讀書直指尚維持巡海觀風奇其文曰是不凡因以姓加其名以志一時賞識因名尚袞後以進士授兵部主事爲諸生時師事王龍溪邃精理學究心六壬奇門火攻戰器及漕運河防子中梓別有傳

南匯志

顧鳳翔字振羽華亭人居漕涇拓落不羈游京師日就塘報中傭書占籍中武科值邊警戒嚴中樞蒿目鳳翔從邸報中熟情形萬歷二十年會試場中首策問及東事條對甚悉大司馬石星詫爲奇才遂掄大魁歷官閩廣

至四川總戎會奢酋亂守禦甚力又督川兵赴援遼左  
游歷邊帥甚著功績

曹家駒  
雜著

唐之屏字君公華亭人居金匯橋萬歷二十年進士除常  
山縣下車與民更始築願豐壩以時蓄洩立常平倉以  
備饑荒禁溺女以厚風俗戢豪強以安良善止開礦以  
絕紛擾民既獲安乃置良田構精舍擇諸生有志者日  
課而月程之士風丕變以中讒罷歸不復出之屏嘗謂  
知義知命知天知時知足遂顏其堂曰五知云

奉賢  
志

楊繼禮字彥履華亭人萬歷二十年進士由庶常授編修  
與修實錄所撰后妃外戚傳時稱直筆歷贊善中允充

松江府志

卷五十四

古今人傳六

三十

日講官晉諭德掌南京翰林院病卒繼禮性至孝嫡母  
曹氏卒哭之淚盡繼以血居官時楚中有警戕撫臣移  
檄郡國有順流而下語神宗以問親臣繼禮言此不過  
恫喝語耳不久自定閣臣以置對後果如其言平生敦  
尚友誼沒之日識與不識皆哀之子汝成天啓五年進

士官至禮部侍郎

郭志  
名臣

朱家法字季則上海人豹孫察卿子萬歷二十年進士出  
守信陽州值大旱賑活飢民鉅萬擒大盜陳三川等州  
境以寧時中官奉旨采礦所至暴橫惟信陽以家法故  
得罷采州人德之歷官工部郎中卒祀名宦

上海  
志

沈時來字君大華亭人居瑁湖橋學士粲裔萬歷二十年  
進士除行人奉使寧夏卻其餽遺典試雲南所拔皆名  
士乞歸數載始授御史董役長陵巡閱三關庫寺京倉  
出按江西以暴疾卒於途時來在西臺省陵工浮冒以  
鉅萬計條革糧長解額公私便之惜不究其用云  
陳志 賢達  
蔡紹襄字仲謨上海人以貢選貴溪訓導萬歷二十八年  
中江右榜官瑞昌令地介江表會陳友諒遺孽有柯王  
二姓幾三千人爲寇紹襄以計擒渠帥六七十人餘衆懾  
服居官清介致仕歸食貧撫庶弟成立子文陞舉人爲

巴陵令有惠政

南匯志

松江府志

卷五十四

古今人傳六

三十一

王孫熙字君文華亭人萬歷二十三年進士令侯官侯官  
號難治令素以鈎距勝孫熙獨務簡靜獄訟用息丁母  
憂去職服闋除天台令人爲大理寺評事有巨璫坐法  
行萬金求免孫熙曰爾金如山我案亦如山論如律大  
理卿救之執不可出守台州地有麻桌不知織購工爲  
機杼教以經緯之法俗生女多不舉嚴禁止之所育女  
皆任織衣被一方號爲王公布郡戍卒多悍餉稍遲輒  
譟孫熙能戢之萬歷四十一年子元瑞成進士卽引疾  
歸元瑞字伯禎授太和令以治最徵拜御史遭母喪終  
養不仕孫熙年八十八卒

通志

高承祚字元錫華亭人士從子初名承禪萬歷七年鄉試得薦將發榜主司及京尹以其名與試題舜命禹合爲改今名二十三年成進士選庶吉士尋丁父憂服闋人都臨朐馮文敏琦公安袁宗道等皆以公輔期之二十年授檢討明年分考會試奉使問封藩王歸里得疾踰歲不起年僅四十七時論惜之承祚性好吟詠與同郡蔡懋孝馮大受楊繼禮相倡和近體秀整高華歌行雄邁有致文筆似曾王而能自運機杼

郭志文苑曝書亭詩話

范允臨字至之華亭人惟丕子蚤孤贅吳門徐氏因家焉

善屬文尤工書法萬歷二十三年進士授工部主事歷

松江府志

卷五十四

古今人傳六

三十一

雲南提學僉事福建參議夫人徐淑亦工詩翰倡和成集嘗築園天平山凡范氏義莊先祠靡不興葺一日析理後事訖端坐而逝子雲威後改必英工詩文人

國朝由舉人薦舉鴻博官翰林院檢討

婁志參修鶴徵錄

顧正心字仲修一字清宇華亭人參議中立子也以諸生人太學任俠好交游家中落乃謀任一歲人頗饒輒以周三黨萬歷十六年歲饑出粟二萬行賑詔旌其門授光祿寺署丞初江陵當國民逋賦至五百兩梟首縣藁街郡里甲沈堯臣張楠六人駢斬南郊正心應役主供張引囚與酒食惻然垂涕曰天平傷哉是皆以役而耗

賦也役困不蘇死者將益衆竭吾心力必爲拯之遂請於朝蠲私財買田贍役用錢七萬四千七百緡母子相權積十六載得四萬八百餘畝分貼細布收辦以至學校城池倉廩監獄坊廂埠頭津夫驛卒靡不分給公私蒙利又設濟荒義學贍族諸田他如繕治黌宮館舍橋梁不可勝紀當是時花園顧氏以義聲振天下然縣令某猶以事致之獄正心因葺獄舍悉代輕繫入贖緩令愧而遣之晚歲以羨金三萬兩呈請貯庫營青浦役田未就疾革以屬其子懿德懿德斥產復置萬畝以成父志臺使疏請褒異辭弗受然是時合邑蘇而顧氏猶力

松江府志

卷五十四

古今人傳六

三十二

役如故士民羣請代之役始命復其家懿德後從選人得光祿寺署正子善有練達有祖風知府方岳貢清覈役田其力爲多又議以濟荒羨米置田贍上海業有成緒而岳貢去官善有亦尋卒其事中廢時論惜之

鄉評錄

朱一德字士隆上海人六世祖木有詩名一德篤學醇謹適館拾遺金俟路側頃之一人號泣至曰吾父逋官錢繫於獄故賣妻贖之而失於路遂還其金萬歷十六年登賢書寓南都中夜有艾婦卽之秉燭待旦終不及亂味爽卽徙之後寓居郡城之南二畮見廟中尸骨無主者捐田葬瘞里中謝某陷大辟當死知其冤辨於官出

之不受一錢生平廉潔自好及其沒也囊橐如洗搢紳

爭賻焉

郭志  
獨行

朱朝貞字孟元華亭人系出宋徽國文公少爲名諸生曾就西安丞不踰年卽投劾歸嘗謂文必東西京可無辱子墨詩必開元大歷可無卑宮商所爲詩賦古文其才故足辦之爲人悃悃無華落落寡合好咀茹釋典與衲子話無生有武邱吟草等集存於家年近八十而卒子蔚字文豹詳藝術

雲間  
志略

顧斗英字仲韓上海人父名世尙寶丞斗英負雋才磊落不羈喜賓客選勝宴游無虛日所居有園林之勝能鑿

松江府志

卷五十四

古今人傳六

三十四

別古器圖書壘洗畢具左右與華亭莫廷韓風流文采相頡頏人稱雲間二韓能詩有盛唐風格善奕工書畫年三十七卒子昉之亦工書翰能詩

陳志文學參  
明朝詩集

范濂初名廷啓字叔子華亭人萬州知州廷言弟也日誦萬言補縣學生名與兄埒是時才士多以鞶帨相高乃作文機十論矯之又著一家言一時推爲赤幟尋上書學使者請削博士弟子籍服山人服隱佘山長貧善病顧汎覽羣籍高視闊步以作者自命著空明子據目鈔兩書傲睨當世譏切時事有以陰怨言於撫軍者遂逮繫已而出之陸平泉誠之曰無再爲足以殺其身也旣

免署所居爲一寒齋以詩酒自娛年七十餘卒

陳志文學參志

略雲間  
雜識

李繼佑字仍啓上海人才思橫溢爲文洸洋縱恣自成一

家與父南春先後舉於鄉著有初學集

上海志

黃希度字叔也華亭人居千山負異稟志行修潔能詩有

開元大歷閒風格每構思廢寢忘櫛不知旦暮人稱爲

苦吟先生

五茸志逸

陸應陽字伯生青浦人晚居郡城初爲縣學生被斥絕意

仕進顧名籍甚詩宗大歷學士黃洪憲及大學士許國

申時行皆折節交之當是時婁東王世貞方以詩文籠

松江府志

卷五十四

古今人傳六

三十五

罩後進士多附之以爲名常譽應陽應陽獨不往世愈

益高之然應陽雖以文名有籌幹嘗修復孔宅議擴郡

城多所施設又好遠游故其游稿凡二十三種又有樵

史太平山房詩選行世卒年八十六作詩喜用鴻雁字

故人呼爲陸鴻雁云

青浦志

喬煒字赤餘上海人副使木冢孫父拱宸起家中翰贈祠

部員外郎煒恭謹雅飭未嘗以門第自高少好學不爲

名士習以副榜貢入北雍會開史局高選名彥煒首與

焉歷掌制誥直起居纂修玉牒授內閣撰文中書舍人

晉禮部儀制司主事尋轉員外郎郎中在職敬慎爲少

師葉文清向高所器居鄉以孝友著聞子舒爲諸生以  
文翰世其家

上海志

楊學禮字伯立上海人少與陸文裕深齊名中歲以病廢  
與曹宏濟滕奎結詩社日相唱酬有寄陸文裕秋興一

律世爭誦之

上海志

黃調元字孟和上海人父崇道以貨殖起家遇貧不能舉  
火喪不能葬者輒捐橐助之歲饑宗人就食者常數十  
人調元早歲食餼善詩古文詞與弟燮元竝有才望董  
其昌李世祺皆令其子師之著有鹿田集同時諸從禮  
號海門弟秉禮皆孝友長厚縣大徭役必力任之年俱

松江府志

卷五十四

古今人傳六

三十六

七十餘卒

青浦志

俞汝楫字仲濟華亭人內行醇備性和易終身不見喜愠  
少有文譽究心理學兼綜經濟之務嘗與東林講席顧  
文端憲成高忠憲攀龍竝重之應大宗伯命輯禮儀志  
百卷病卒里中私謚爲端慤先生知府方岳貢改曰清

惠

郭志文苑

李煥然字子文上海人長史伯璵曾孫性恬雅絕意進取  
教授里中祠部張烈侍郎蔡汝賢其高第弟子也從子  
可教字受甫年十二能屬文趙貞齋遴爲贅壻年十八  
補諸生其先世儲書萬餘卷遭倭寇悉散佚可教多方

訪購風鈔雪寫得還十五六校讎點勘丹黃爛然課貞齋二子補諸生督其子逢原逢申世其學生平砥礪名節爲鄉閭所重逢申自有傳

上海志

黃廷鳳字孟威青浦人以歲貢任大理府同知定雲龍州之亂改世官爲銓鹽井課不登臺使特委之削耗羨浮額三月而辦歲課十之六會中州王彭伯掌銓事覈實績超擢武定府知府卒

青浦志

顧鼈字克載上海人端方鎮靜有古人風貢入京師廷試第一授黃陂教諭訓諸生必先德行以身範物化行一邑黃陂祀之名宦歸里時策紫竹杖訪友清談未嘗乘

松江府志

卷五十四

古今人傳六

三十七

軒嘗舟行墮水猶讓同溺者先登其不苟類如此學者

稱遜齋先生

上海志

呂克孝字公原華亭人居七寶父錦官通判克孝萬歷二十五年應天鄉試第一主考朱國祚葉向高甚器之選如臯教諭纂輯邑乘簡核有法晉國子助教大理司務轉都察院是時向高居首揆國祚竝在政府克孝秉節不屑干進擢繕部郎司權荊州罷歸著詩自娛年六十

六卒

婁志

曹蕃字价人華亭人居干溪銑子萬歷二十五年舉人授荊州通判居官廉正轄荆關稅務正供外絲毫悉貯庫

仍不多報曰恐爲異時例也神宗末以邊警徵川兵道  
夷陵蕃署州篆調遣供頓有方略比出境無譁者乞休  
歸房師睢陽何偉寰沒無嗣蕃走三千里哭之捐金置  
祭產井爲立後蕃著述甚富存有詩集五卷

金山志

姚永濟字通所上海人祖一詳肄業太學嘗拯湖州一生  
於厄不問姓名後除臨江知事有直指劉某按部見一  
祥名召謂之曰余故湖州遇難生也無以報公察有冤  
繫五人罪可釋公第與言可致千金一詳卽上繫者名  
直指釋之詭云得金實不受一時傳爲盛事永濟萬歷  
二十六年進士初令東陽值歲荒設法賑濟多所全活

松江府志

卷五十四

古今人傳六

三十八

豪家婢不及時婚配者罪其主薄俗頓改妖民嘯聚山  
谷討捕之餘黨悉降調永嘉遷刑部主事擢禮科給事  
中時楚藩被誣禁錮子女一百二十餘人永濟上疏言  
其冤上感悟卽詔歸國在諫垣章數十上直聲大振崇  
禎二年備兵太原尋轉浙江右布政絳吏議歸永濟好  
參同內景家言采類書二百餘卷爲學撮六卷年九十  
七卒弟永豫外衛經歷好施樂善有祖一祥風

上海志  
參東陽

縣志

莊則孝字慶卿華亭人居朱涇萬歷二十六年進士授興  
化推官歷南兵部郎中有循績事親至孝內外無閒言

以孝行旌於朝祀鄉賢

金山志

張以誠字君一青浦人弼元孫萬歷二十年選貢太學遭生母喪或以壓嫡爲辭且便省試以誠泣謝不可持服如制萬歷閒制舉業嘉興馮夢禎會稽陶望齡同郡董其昌相繼稱宗匠以誠後起清純高古與三人竝稱二十九年成進士廷對第一授修撰旋丁母憂孺慕無閒所生服闋起知起居注遷左春坊左中允以東宮久虛講席上言宮闈非進學之地內侍非勸學之官宜命皇太子出御講筵以重國本慰人心援引得失詞旨剴切時論譴之四十一年轉右春坊右諭德壬子主試福建

松江府志

卷五十四

古今人傳六

三十九

所得士皆名俊以誠舉止安雅敦尚名節以古人自期於經史百家朝章典故莫不該洽門無雜賓勤於筆墨短牋小疏咸出手裁文章宗歐蘇詩擬孟襄陽小楷規摹大令清勁有法屢乞省親未報會使命旋里父卒哀毀過度遂咯血不起年四十八著有國史類記毛詩微言酌春堂集須友堂集子安茂順治丁亥進士

郭志名臣

張以謐字伯安青浦人以誠從弟少嗜古爲文章與以誠聲譽相埒知縣羅朝國有國士之知後朝國躋九列以謐未嘗通一札也同學徐方廣王宇春聞啓祥等咸推重其文年四十餘棄諸生號鈍叟自爲志狀人稱其曠

達年八十五卒著有來燕堂集

青浦志

徐禎稷字叔開青浦人三重子萬歷二十九年進士除刑部主事歷員外郎中出知夔州遷川東兵備道以父年七十乞侍養起補愠處道引疾歸屢薦不出以名德重江南初三重在西曹欲出一非罪者不得至是禎稷復官刑部切誠之故父子後先爲刑官皆以用法平爲世所稱三重作政要二十四條示之禎稷以家訓嚴不寄一物嘗賦詩云丙穴有魚堪作膾因風不敢寄高堂及寄語機雲山水下山仍似在山清清門廉吏人比之

胡威父子銘常字成紀崇禎六年舉人

青浦志參明詩綜

松江府志

卷五十四

古今人傳六

四十

徐伯孫字得師華亭人居蔣涇橋家貧傭書養母母顧氏病伯孫兩日連割股肉以進母病得瘳里人上其事於巡按御史徐某表其閭且命郡邑給粟帛以周其母

雲間

志略參修徐氏族譜

施一化字涌川上海人以諸生入太學性孝友撫二弟如子以已產均析之歲凶出粟賑饑更割田助役詳見唐文恪志中子于蕃字价夫事繼母以孝聞萬歷癸巳貢成均授溧陽訓導丁艱哀毀遂不起邑人立碑以識之

南匯志

馮大京華亭人邑諸生恩孫達可子達可病劇大京禱於

天刲股肉作羹以進絕而復蘇又三年卒大京諸孫汝翼亦以刲股旌

婁志

張可成青浦人萬歷二十三年父守誠卒成鬻身營葬母馮患病醫禱不效割股以進病隨愈同縣又有張楸者亦以割股愈母

郭志獨行

周應文華亭人居白沙里三歲失母萬歷丁酉秋父患心疾醫禱莫效欲往普陀求方救父遂自劓胷深闊各三寸餘卽投海漂二十里水至脛不沒至柘林有磐石遂坐其上所開竅若析榴然晝夜不飢不癡會百夫長吳某以母病乞方還舉以授文欣然剗血和藥進父服

松江府志

卷五十四

古今人傳六

四十一

之立止

郭志獨行

朱永泰字雲陽上海人耽讀不治生產徐文定光啓延訓其子及文定居相位屢邀不赴郡守方岳貢推舉鄉飲優禮備至子維垣維屏皆諸生孫錦自有傳

南匯志

俞肇初華亭人早喪母竭力事父晨夕得歡心父病侍湯藥必嘗而進迨沒就墓縛茅爲棚晴耕雨織至老不徙每祭號慟如初喪人皆感動顛請旌揚肇初泣辭曰子道多缺敢望人知邪知事黃某表其廬曰純孝可嘉又令里中刻石墓旁曰廬墓芳蹤時萬歷三十五年五月

華亭志

瞿光位字明巖華亭人居干山父以怨家誣侵糧繫金陵  
光位年十六往來奔救聞御史按部單身走風雪中沿  
舟號呼至夜力竭歐血僵雪中幾死已而聞雞聲復驚  
起奔號如故數日後御史聞白其冤釋父歸三十始娶  
勤耕織爲菽水歡山陰王思任有篤行處士傳五茸志逸  
宋堯咨字中允華亭人父坤好游久客吳中產盡耗堯咨  
迎還故鄉曲盡孝道事母尤謹偶入城忘告半道回船  
還白乃行性喜著書及卒有肱其稿去者遂失之奉賢志  
張所望字叔翹上海人居龍華里萬歷二十九年進士除  
刑部主事奉使榮襄靖江三國餽遺一無所受諸王雅

松江府志

卷五十四

古今人傳六

四十二

重焉出守衢州衢俗囂訟而奸民左右兩造間舞智設  
機譎詭不可誥所望廉得之閱牒輒知主文者某某卽  
逮訊窮治剖決若神遷副使備兵蒼梧時嶺表法令弛  
所望至繕城隍實倉廩簡屯戍若藤峽崑崙鬼門句漏  
諸要害無不身歷慰撫窮山炎谷喜見大吏皆搏顙受  
約束有羅運猺者阻溪洞戕熟猺所望馳檄諭之遂輸  
貢爲編戶漢以來所未寶也轉左江參政隆峒長官黃  
兆基少子與其兄遺孤爭襲仇殺累年所望討平之將  
吏請郡縣其地所望曰師以定亂奈何斬人祀以自利  
邪置其長而還擢廣東按察使不就起爲湖廣按察使

理漕政時兵興轉輸煩亟以積勞疾作解職歸再起山東右布政使固辭不拜所望清羸如不勝衣顧卒當大事擇可而爲之雖拔山力莫能移急人之難唯恐後嘗買一婢詢知爲名家子撫爲己女擇壻爲匱具以嫁之年八十卒初粵有吳向春者善爲蠱所望拘至窮治之遂滅其術人稱快焉生平著述甚富有梧潯雜佩嶺表游記幅員名義考文選集註辨疑龍華里志等書行世

郭志名臣參  
上海縣志

張鼐字世調華亭人鑿從孫萬歷三十二年進士改庶吉士授檢討天啓時官少詹事上保身養性勤學敬天法

松江府志

卷五十四

古今人傳六

四十二

祖親賢納諫信令卹民存體十事語斥近習魏忠賢惡之擢南京禮部右侍郎上疏引疾忠賢責以詐疾要名削其籍崇禎初起故官協理詹事府旋改吏部右侍郎

未上卒諭祭諡文節

婁志

徐光啓字子先上海人萬歷二十五年舉鄉試第一又七年成進士由庶吉士歷贊善從西洋人利瑪竇學天文歷算火器盡其術遂徧習兵機屯田鹽筴水利諸書楊鎬四路喪師京師大震累疏請練兵自效神宗壯之超擢少詹事兼河南道御史練兵通州列上十議時遼事方急不能如所請光啓疏爭乃稍給以民兵戎械未幾

熹宗卽位光啓志不得展請裁去不聽旣而以疾歸遼陽破召起之還朝力請多鑄西洋大礮以資城守帝善其言方議用而光啓與兵部尙書崔景榮議不合御史邱兆麟劾之復移疾歸天啓三年起故官旋擢禮部右侍郎五年魏忠賢黨智鋌劾之落職崇禎元年召還復申練兵之說未幾以左侍郎理部事帝憂國用不足敕廷臣獻屯鹽善策光啓言屯政在乎墾荒鹽政在嚴禁私販帝褒納之擢本部尙書時帝以日食失驗欲罪臺官光啓言臺官測候本郭守敬法元時當食不食守敬且爾無怪臺官之失臣聞歷久必差宜及時修正帝從

松江府志

卷五十四

古今人傳六

四十四

其言詔西洋人龍華民鄧玉函羅雅谷等推算歷法光啓爲監督四年春正月光啓進日躔歷指一卷測天約說二卷大測二卷日躔表二卷割圓八綫表六卷黃道升度七卷黃赤躔度表一卷通率表一卷是冬十月日食復上測候四說其辯時差里差之法最爲詳密五年五月以本官兼東閣大學士入參機務與鄭以偉竝命尋加太子太保進文淵閣光啓雅負經濟才有志用世及柄用年已老值周延儒溫體仁專政不能有所建白明年十月卒贈少保諡文定

明史

黃體仁字長卿上海人居川沙萬歷三十二年進士時館

李文節廷機邸廷機令試館職體仁謝曰老矣不足以辱此選門人徐光啓者博學而賢用世才也請以自代以故光啓入翰林體仁由刑部主事遷員外郎轉郎中出知登州府罷坊市雜稅豪右斂手衛有建文忠臣陳迪子孫尚在戍籍爲陳乞脫其伍又爲迪與戚繼光請諡秩滿擢東兗道副使而福王適之國舟車填湊時值歲祲體仁裁置以法因條上臺使盡革迎謁供億諸費民得不困當路滋不悅罷歸所著奏議詩文雜著二十六卷撰續上海志田賦諸篇稱詳覈云

郭志名臣

姚士慎字岱芝華亭人居五保參曾孫九歲能屬文登萬

松江府志

卷五十四

古今人傳六

四十五

歷三十二年進士選庶吉士改吏科給事中累陞光祿寺卿丁艱起大理少卿尋擢通政使晉南京刑部尚書致仕士慎在諫垣論開礦忤旨謫官閩中佐廷尉時奉敕推勘魏閹奸黨以六等定罪執法不阿晚年息影林泉戒子孫由禮從儉約卒於家予廕賜祭弟士恆天啓二年進士知浦城縣擢監察御史以著績聞

金山志

李凌雲字峻甫華亭人萬歷三十二年進士知山東諸城縣有清節士民懷之邑先有三賢侯祠得凌雲而四焉徵拜御史出按八閩鋤奸剔弊不爲矯激亦不可干以私崇禎間以太僕寺卿致仕門無雜賓郡縣守令歲時

一投刺而已至清議所關未嘗不義形於色嘗有縣佐  
廷辱君子合郡譁然令力庇之凌雲出持論侃侃令聞  
凌雲出固已驚及見踖踏拊凌雲曰毋怒繫佐於獄衆  
怒乃解同年丁化宇奉差至松暴卒凌雲捐數百金親  
視含斂著有小善錄佩言晚香堂采藥編魯志  
王善繼字孝冲華亭人居後岡萬歷三十二年進士授刑  
部主事大璫高淮以遼左事就逮其同類馬謙亦以盜  
庫鉛事發覺先後下部善繼抗議以爲二奸依憑城社  
蠹邊耗國宜亟下所司究如律朝論躓之擢守建寧有  
惠政以勞疾乞休當路惜之子獻吉萬歷丙午解元爲

松江府志

卷五十四

古今人傳六

四十六

膠州守以循行稱膠人思之

郭志名臣

陳國是字與同青浦人居珠街角鎮萬歷三十二年進士  
授刑部主事丁艱服闋補工部管節慎庫左遷長蘆運  
判轉南刑部主事員外郎郎中出爲寶慶府知府郡紳  
某府衆怨因與爲難羣不逞千餘人揭竿而起國是諭  
以威信隨解散有諸生聘妻蕭氏江川王強委禽焉生  
投牒懇王以書來國是立呼鼓吹爲生成禮配焉轉廣  
西副使移病歸國是性淳厚無城府兄弟垂白友愛彌  
篤每聚會輒留連經旬不忍別撫諸姪有恩子元燾崇  
禎九年舉人有醇行遷居郡城次增遠 恩貢生

郭志獨行

顧國縉字寅美上海人萬歷三十四年舉人任南國子監丞時操江劉志選將建魏璫祠於文廟左國縉以死爭曰誰敢爲先聖萬世罪人遂寢遷刑部郎中出爲按察副使分巡桂林時猺賊楚寇相繼犯境國縉擊走之論功以疾請老甲申三月聞變慟哭不食死

國朝

賜諡忠節

江南通志 欽定勝朝殉節諸臣錄

陸明揚字伯師上海人父柝諸生因踐更嘗忤邑令敖選會族人楠謀柝貲積未饜楠戚曹忬奪奴妻奴恚自經乃噉忬碎尸顛誣柝縱明揚行淫殺其夫白選選因以

松江府志

卷五十四

古今人傳六

四十七

報其私擄掠無不至獄成坐明揚抵臺司疑其事傳繫青浦弟明允負糗糧走百里視其兄獄中者三年青浦令屠隆夜行獄閱讀書聲異之察知其冤因力請平反知府閻邦寧執不可久之始得釋柝晚官浦城縣丞攝縣事最久會上官不令粟出境而浙之江山大裨乃矯指通糴全活無算浙人稱之明揚事旣白益發憤爲學中萬歷癸卯舉人閱歷憂患故能究悉世務嘗請行包補以贍貧竈改漕折以正土宜鄉里感德教諭靖江獎掖士類常若不足沒後崇祀名宦祠著有紫薇堂稿明允字臣受性孝友時當訟獄交困外謀捍禦內奉親歡

色養備至平生樂善不倦濬趙家溝尤爲一方利賴好吟詠旁通青烏家言書法遒勁有致康熙癸卯崇祀鄉

賢祠

陸氏家傳

張大綸字仲仁華亭人年十六而孤家多外侮卽能挺身任事擒叛奴置之法諸兄皆賴之少工制舉義試輒冠軍一時名士樂與之游然嚴於擇友無纖毫假借仲兄圖南不善治生剖產贍之代償逋以千計沒則任葬姊適戴氏迎養終身伯父敬庵依之以老喪葬皆盡禮三黨老弱咸倚以爲命性甚介外家楊氏無子貽資數千金堅辭不受邑中權貴勢盛大綸略不畏避及海剛峯

松江府志

卷五十四

古今人傳六

四十八

泣政郡人皆齷齪權貴貴人慮其爲梗以汶陽返之綸曰吾豈乘人之厄者邪竟不受剛直慷慨力行古道年

六十卒

吳騏集

方道行字省吾華亭人居金匯塘西正學先生九世孫初正學遺孤必昌在松冒姓俞語在俞允等傳萬歷三十八年督學楊公奏明復姓於是共知正學有後而以道行奉祀金陵道行上海縣學生篤志舉業安貧樂道竭力捐資建祠捐田瞻祭士大夫皆重之子忠祚上海縣學生亦以文行稱

郭良俊字少谿上海人其先廬州人以軍功世襲錦衣衛

千戶後徙居邢竇湖良俊少喪父以孝聞慷慨明大義  
嘗適野拾遺金堅坐以俟三日不獲遂以所拾金并  
益己資建石梁於廟涇民不病涉卽名廟橋子繼周字  
可卿天啓四年舉人

上海志

松江府志卷五十四終

松江府志

卷五十四

古今人傳六

四十九